

UIAM ungguli debat gender

» Anugerah pendebat terbaik kedua-dua kategori turut diraih UIAM

Oleh Lum Chee Hong
dan Faizatul Farhana
Farush Khan
bhnews@bh.com.my

■ Serdang

Universiti Islam Antarabangsa Malaysia (UIAM) muncul johan kategori Bahasa Melayu dan Bahasa Inggeris Pertandingan Debat Perdana Gender 2014 yang berakhir di Universiti Putra Malaysia (UPM), malam tadi.

Kedua-dua pasukan menerima hadiah RM3,500, piala pusingan dan trofi iringan yang disampaikan oleh Menteri Pembangunan Wanita, Keluarga dan Masyarakat, Datuk Seri Rohani Abdul Karim pada majlis turut dihadiri Timbalan Naib Canselor (Hal Ehwal Pelajar dan Alumni) UPM, Prof Datuk Dr Mohammad Shatar Sabran.

Kategori Bahasa Melayu mengenangkan usul aspek gender sebagai teras dalam pengubahan dasar, menyaksikan Universiti Teknologi MARA (UiTM) muncul naib johan, manakala satu lagi wakil UIAM



Rohani (berdiri, enam dari kanan) dan Mohammad Shatar (tujuh dari kanan) bersama **pemenang pertandingan Debat Perdana Gender 2014** di Universiti Putra Malaysia, Serdang, malam tadi.

[FOTO MOHD KHAIRUL HELMY MOHD DIN/BH]

di tempat ketiga dan Universiti Malaysia Sabah (UMS), keempat.

Naib johan dan tempat ketiga kategori Bahasa Inggeris yang mengutarakan topik berkaitan peranan wanita dalam aspek perundangan juga diraih oleh UiTM, manakala tempat keempat Universiti Malaya (UM). Naib juara setiap kategori menerima hadiah RM2,500, tempat ketiga (RM2,000) dan keempat (RM1,500).

Pendebat terbaik keseluruhan kategori Bahasa Melayu adalah Ani Najihah Md Shah, manakala kategori Bahasa Inggeris pula milik Ahmad Hazim Nurahmadi. Kedua-dua pelajar UIAM itu membawa pulang hadiah

wang tunai RM600.

Pertandingan anjuran Institut Pengupayaan Wanita bagi Pergerakan Negara-Negara Anggota Berkecuali (NIEW) itu kali ini disertai keseluruhan 102 pasukan.

Tingkat kesedaran gender

Program itu yang dianjurkan sejak tahun 2011 dengan kerjasama Majlis Debat Universiti Malaysia (MADUM) bagi meningkatkan kesedaran, medan bertukar idea serta memperkasa topik berhubung isu gender dalam kalangan masyarakat, terutama belia.

Dalam ucapannya, Rohani berkata, kementeriannya mengumpul banyak idea dan cadangan hasil penganjuran pertandingan debat itu serta akan

dipertimbangkan untuk perancangan dan pelaksanaan program kementerian di peringkat akar umbi.

"Program sebegini amat perlulah supaya generasi muda dapat berbincang dan berbahas mengenai isu gender supaya mereka sedar mengenai peranan dalam memikul amanah memimpin negara pada masa depan," katanya.

Katanya, kementerian juga bercadang membawa pertandingan itu ke peringkat lebih tinggi dengan penyertaan institusi pengajian tinggi (IPT) luar negara, selain mengesyorkan penubuhan Alumni Debat Gender sebagai rakan strategik NIEW dalam menyebarluaskan kesedaran gender kepada golongan muda.